

**Dansk Institut for Internationale Studier, DIIS, pillugu inatsisip Kalaallit Nunaannut atortuulersinneqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut, tassa imaalisinnaangorlugu Inatsisartut Naalakkersuisullu DIIS-miit sammisanik Kalaallit Nunaannut Issittumullu attuumassuteqartunik nassuiaatinik qulaajaanernillu piniarsinnaangorlugit, Inatsisartut Naalakkersuisullu DIIS-imik atuisinnaanerit annertusarlugu.**  
(Inatsisartunut ilaasortaq / Medlem af Inatsisartut Sara Olsvig, Inuit Ataqatigiit)

### **Akissuteqaat**

(Naalakkersuisut Siulittaasuat

kiisalu Nunanut Allanut Naalakkersuisunut Ilaasortaq)

### **Siullermeerneqarnera**

Inatsisartunut ilaasortaq Sara Olsvig, Inuit Ataqatigiit Inatsisartut aalajangiiffigisassaattut siunnersuuteqarpoq, tassalu Naalakkersuisut peqquneqassasut Dansk Institut for Internationale Studier pillugu inatsisip atortuulersinneqarnissaa. taamaasilluni Inatsisartut Naalakkersuisullu DIIS-miit sammisanik Kalaallit Nunaannut Issittumullu attuumassuteqartunik nassuiaatinik qulaajaanernillu piniarsinnaangorlugit. Taamatuttaaq kissaatigineqarpoq Inatsisartut Naalakkersuisullu DIIS-imik atuisinnaanerit annertusarsinnaajumaassasoq. Naalakkersuisunit nunani tamalaani ilisimatusarnernut annertunerusumik ilisimatusartoqarnissaanut sammisaqarneruneq qutsatigineqarpoq.

DIIS tassaavoq arlaannaannulluunniit attuumassuteqanngitsumik nunani tamalaani ilisimatusarnermik ingerlatsisartuulluni naalagaaffimmit ilisimatusarnikkut ingerlatsivik, nunarsuarmioqatigiileriartorneq, isumannaallisaaneq aamma ineriartorneq pillugit qaffasissumik nunani tamalaani ilisimatusarnermik misissueqqissaartarnermillu sulinerik ingerlatsisoq. Ilanngulluguttaaq DIIS-imit ingerlaavartumik Danmarkip nunanut allanut naalakkersuinikkut inissisimaneramik nalilersuisarpoq naalakkersuinikkullu aalajangiisartut kikkullu tamat ilisimatittarlugit. DIIS tunngaviusumik ilisimatusarnermik, siunnersuisartut sulianik aamma suliassanik inniminnerneqarsimasunik ingerlatsisarpoq, soorlu assersuutigalugit qulaajaanernik.

Issittumut tassanilu Kalaallit Nunaannut annertunerusumik samminninneq naapertorlugu - aamma oqartussaaffinnik amerlanerusunik Kalaallit Nunaata tiguisarnera peqatigalugu, Kalaallit Nunaata nunani tamalaani oqaloqatigiinnernut peqataanera aamma annertusiartorpoq. Pissutsit taamaattut pissusissamisoorlippaat pisariaqartillugulu Kalaallit Nunaata nunani tamalaani iliuuseqarnera kiisalu sunniuteqarnera pillugit ilisimatusarnerup nukittorsarneqarnissaa. Naalakkersuisunit annertusisamik ilisimatusarneq tapersorneqarpoq minnerunngitsumillu nunani tamalaani qaffasissumik ilisimatusarnikkut arlaannaannulluunniit attuumassuteqanngitsumik misissueqqissaarluni sulineq. Taamaattumik siunnersuut tassalu DIIS pillugu inatsisip Kalaallit Nunaannut atortuulersinneqarnissaa assut tulluarpoq oqaloqatigiissutigissallugu.

DIIS-ip namminneq ilisimatusarfigisartakkatik nassuiartarpaat apeqqutaatillugu DIIS-imi ilisimatusartunit maannakkorpiaq pisuni inuiaqatigiinnut naalakkersuinikkullu ataqatigiinnernut tunngatillugit immikkut soqutiginaateqartuunersut. Inniminnikkanik

saqqummiunneqartussat sulinerit Folketingimit, ministeerianit, ngo-nit allanilluunniit inniminnerneqarsimasuusinnaapput. Tamakku tunngavigalugit Naalakkersuisut isumaqarput, pitsaasumik oqaloqatigiinnissamut tunngavigineqartussaq unaammat siullermik paasissallugu qanoq annertutigisumik Folketingimi ilaasortat kalaallit, NGO-t kalaallit nunaanneersut minnerunngitsumillu Naalakkersuisut periarfissaqareernersut DIIS-imit immikkut ilisimasaqarfigineqartutut pigineqartut sunniuteqarfigissallugit atussallugillu.

Taamaattumik Naalakkersuisunit Nunanut allanut Ministeriaqarfik aamma DIIS oqaloqatigerusunneqarput siunissami qaninnerusumik suleqatigiissinnaanissaq pillugu. Pingaartuuvorli suli sulissutigissallugu Kalaallit Nunaanni Ilinniarnertuunngorniartarfiup (Ilimmarfiup) qaffasinnerusumik Kalaallit Nunaanni ilinniagaqarnernut ilisimatusarnernullu katersuuffittut pigiinnarneqarnissaa.